

Gatazka egoera «baliteke laster desbokatzea» Gutierrezen ustez

Verarekin harremanetan izan da Gernika Gogoratuz-eko zuzendaria

Euskal Herriak bizi duen gatazka egoera «laster desbokatzea» Juan Gutierrez Gernika Gogoratuz talde bakezaleko zuzendariaren ustez. Hori gertatu ahal izateko «nahikoa komunikazio» egon da, bere esanetan, bi aldeen artean. Gutierrez bitartekaritza lanetan saiatu da.

DONOSTIA

Gernika Gogoratuz bakearen aldeko taldea 1987an sortu zen. Gatazka politikoak ikertzen dituen akademi gisa jarduten du, eta Eusko Jaurlaritzako Kultura Sailak diruz laguntzen du. Isilean egiten du bereziki lan; Juan Gutierrez zuzendariak dioenez, «guk egiten dugun lanaren bat zapuztu egingo litzateke bere hastapenetan iritzi publikoari jakinaraziko balitzai».

Gernika Gogoratuz-eko kideak Rafael Veraren eta Eugenio Etxebeste 'Antxon' arteko mezu trukaketarekin erlazioan dituzte azkenaldian. 'El Correo Español' egunkariak atzo kale-ratutako elkarrizketan, Juan Gutierrezek onartu egiten du Rafael Vera Estatuko Seguritasunerako idazkari nagusiarekin harremanetan izan dela, baina bestelako zehaztasunik eman gabe. Ez di-rela «mezulari», «hirugarrenak» baizik dio Gutierrezek berak zuzentzen duen taldeari buruz. Ez da inoiz Santo Domingon egon, eta ez du Jose Luis Arrieta Zubimendi 'Azkoiti' ezagutzen, «erakundeak dioenez Antxon da kontaktua, eta guk ez dugu ma-niobrarik egiten», esan zuen.

ETArekin harremanak dituen



Juan Gutierrez Eduardo Vallejo Gernikako alkatearekin. XOUSE SIMAL

galderari ihardetsiz, «ez dut inoiz ETAkoa dela esan didan inorekin hitz egin. Baina ETArekin harremanetan daudela badakidan batzurekin hitz egin dut», adierazi zuen.

Bitartekaritza lanetan jarduten duela bereziki Gernika Gogoratuz-ek dio Juan Gutierrezek, «baina gure funtsezko helburua babes zientifikotik bakeari ekarpenak egitea da».

«Guk bilatzen duguna» dio elkarrizketako beste pasarte batean, «independentziaren alde borrokatzen dutenen artean eta bakea berehala nahi dutenen artean sintonia bat lortzeko helburuarekin aurrera egitea da».

Konponbideei buruz hitz egi-terakoan, «epe laburrean armak euskal gatazkatik aldentzeko aukera irekia dago» dio Gutierrezek.

«Baliteke laster egoera desbokatzea. Hori oraintxe bertan gerta daiteke, edo urtebete baino lehenago. Hori da gure aurrikuspena» azaldu du.

Juan Gutierrezen esanetan, «bi aurkarien arteko nahikoa komunikazio egon da hori gauzatu ahal izateko». Bi aldeak —ETA eta Gobernu— gogoeta epe batean ote dauden galderari erantzunez, «ezagutzen ez ditugun gauza asko daude hor barruan, baina baietz uste dugu, desbokatzea egon zitekeela».

Hurrengo hurratsa «elkarrizketa zabala» irekitzea litzateke Gernika Gogoratuz-eko partaidearen ustez. «Eta hori babestu egin beharko litzateke ez dadin hautsi, hori da bitartekaritzaren artea», gaineratzen du 'El Correo Español'-eko elkarrizketan.

Rigoberta Menchu Foruma bihar zabalduko du Elkarrizketa

TOLOSA

Elkarri-k Rigoberta Menchuren izena duen elkarrizketa, akordioa eta bakearen aldeko Foruma zabalduko du bihar, Tolosako Laskorain kalean. Aurkezpena arratsaldeko zazpi t'erdietan egingo du gizarte mugimenduaren Tolosako tailerrak eta bertan izango dira, beseak beste, Andoni Egaña eta Angel Mari Peñagarikano bertsolariak eta Tapia eta Leturia trikitilariak.

Iragan abuztuaren Sean Elkarrizketa eta Rigoberta Menchu 1992ko Bakearen Nobel sari-dunak lankidetzak akordio bat hitzartu zuten NBERen Genebako egoitzan. Akordio haren eraginez, Elkarrizketa Foruma sortzeko konprometua hartu zuen, elkarrizketaren eta akordioaren filosofia-aren sustapenerako.

Ostiralean, hilaren 26an, bere lehen hitzaldia eskainiko du Rigoberta Menchu Forumak, Luis M. Xirinacsen es-

kutik. Hizlaria nazioen arteko bakeaz mintzatuko da.

Duela 61 urte Bartzelonako familia burges batean sortua, Luis M. Xirinacs Espainiako Gerra Zibila bizi izan zuen haurra zelarik. Bere aita eta beste zenbait senitarteko preso egon ziren, eskuindarrak izateagatik. Filosofia, magisteritza eta teologia ikasketak egin zituen. 1955ean apaiz sartu zen eta 9 urtez irakaskuntzan aritu zen.

Gero eskolapioak utzi zituen eta Bartzelona inguruko eliz-barruti txikietan jardun zuen. 1969an politikari ekin zion, beti ere filosofia bakeza-learen ikuspuntutik. Urtebete geroago bere aurreneko gose greba egin zuen, Burgosko prozesua zela eta. 1973tik 1975era ere kartzelan egon zen. Hiru aldiz izan zen Bakearen Nobel saria jasotzeko hautagai eta 1975etik 1977era Bartzelonako Modelo kartzelaren aurrean izan zen, amnistia politikoaren eske.

Bost preso jipoitu dituztela salatu du Senideak elkarteak

BILBO

Senideak elkarteak azken asteotan bost presok jasan dituzten jipoiak salatu zituen atzo. Juan Carlos Tapiarena traslado baterako zain Valdemoro kartzelako ziega amankomunean zegoenean gertatu zen. Praxak jaitziarazita eta bularra agirian kolpeak hartu zituen barrabil eta hanketan. Lurrera botata ostikadak eta mehatxuak jasan zituen goardia zibilengandik. Burgos eta Langraizko espetxeetan berriro gertatu zirela jakinarazi zuen Senideak.

Unai Parot, Baionako preso Valdemoroko espetxean egurtu zuten. Senideek emandako bertsioaren arabera, Baionako preso Almeriatik Madrilgo espetxe ho-

rretara eraman zuten hilaren 18an. Hurrengo egunean Valdemoroko funtzionari bik jipoitu zuten ziega barruan.

Tolosako Esteban Esteban Puerto-II espetxera aldatu zuten goardia zibilen eskutik jaso zuen jipoia. Hurrengo egunean beste jipoi bat jasan zuen Cordobako presondegian. Senideak-ek azaldu zuen presoak min handia daukala saihets eta barrabiletan.

Ander Mitxelena azaroaren Sean egurtu zuten Kanaria Irletako Salto del Negrotik Langraizera bidean. Valladoliden irainak eta karate kolpeak hartu zituen. Berdintsu gertatu ei zitzaion Burgostik atera eta Langraizera heldu zenean.

Azkenik, Patxi Antolin Cordoban jipoitu zuten iragan larunbatean.

Europako hauteskunderi begira EAJrekin negoziatuko du UVk

VALENTZIA

Union Valenciana (UV) alderdiak EAJrekin negoziatuko du 1994eko ekainean egingo diren Europako hauteskundera zerrenda berean aurkezteko aukera. Bilbora etorriko da gaur Vicente Gonzalez Lizondak UVko lehendakaria buruzagi jeltzaleekin elkarrizketatzeko. Negoziazioak zehaztuko ditu eta ziurrenik etzi bilduko da Xabier Arzalluzekin.

Gonzalez Lizondok atzo adierazi zuenez, Coalicion Canaria alderdiarekin ere harremanetan jarri dira koalizioa osatzeko aukeraz hitz egiteko. UVk ez du baztertzeko PAR (Partido Aragonés Regionalista) bezalako beste alderdi batzuekin ere akordioa lortzea Europako hauteskunderi begira. EAJ bere aldetik Coalicion Canariarekin negoziatuetan da, orain lau urte osatu zuten koalizioa errepikatze asmotan.

USURBILGO FRONTOLARIAK:

IMUNTZO ETA BELOKI
JULIO KAGETA
E.H. SOKARRA

TXISTE KONTALARIA:
GILBERTO SEGUROLA

LAZARIK:
MADDALEN LUJANBIO
JESUS M. IRATU

EGUNKARIA
SARRERA 700 PZTA

AZAROAK 27
GAUEKO 11ETAN

EDIZIONAK